



Charissimo in Christo filio nostro Philippo
Hispaniarum Regi Catholico.

ALEXANDER PP. VII.

Charissime in Christo fili noster salutem, & Apostolicam benedictionem. Pro charitatis paterna debito sedulam profecto curam adhibuimus extinguendis seminibus scandalosarum, dissensionum, grauiumque turbarum, quas à nonnullis annis occasione nouarum alterationũ de Beatissime Virginis Deiparæ Conceptione rursus in Regnis Hispaniarum acriter excitatas esse, cum è Maiestatis tuæ, tum è plurimorum Episcoporum, & aliorum ab hac sancta Sede remedium exposcentium litteris intelleximus. Nam post inuocatã repetitis precibus Spiritus Sancti gratiam, sæpè viros insigniter doctos, & Religiosos auditos, habitas plures, præsertim Venerabilium Fratrum nostrorum S. R. E. Cardinalium, Generalium Inquisitorum consultationes, de illorum consilio pariter, & assensu, Constitutionem edidimus, quam sanè (benedicente Domino) conscientiarum, & animorum quieti componenda salutarem piæ deuotionis profectibus accommodam, atque singulari, & in hac quoque re præclare spectata pietati tuæ, magnoperè gratam fore speramus. Cuncta porrò distinctè magis ex venerabili Fratре Episcopo Placentino, pro hac agēda causa Oratore ad Nos tuo, cuius egregia doctrina, & religionis, accensa studia, toto huius negotij pertractati tempore Nobis benè cognita, & valde probata sunt, tum ex Apostolico Nuntio nostro coram audies. Interim Nos Maiestati tuæ Deum vsque propitium, & aspirātem ex omni corde precamur, & Apostolicam benedictionem amantissimè impartimur. Datum Romæ apud Sanctam Mariam Maiorem sub annullo Piscatoris die x. Decembris M. DC. LXI. Pontificatus nostri anno septimo. F. Florentin.

